



Uunga siunnersuut: Atuarfik pillugu Inatsisartut inatsisaata allangortinneqarnera pillugu Inatsisartut inatsisaat (Atuartitsinerup imaa, aqqissugaanera, piareersarneqarnera, atuartut amerlassusaat, ikiuinermi atassuteqarfissaq aamma atuarfimmik aqutsisutut ilinniartitaaneq pillugu malittarisassat allangortinneri)

(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq)

Siullermeernera

Atuarfik pillugu Inatsisartut inatsisaata allangortinneqarnera pillugu Inatsisartut inatsisaat nr. 15, 3. december 2012-meersumi, Inatsisartut inatsisaatigut nr. 21, 13. november 2017-imi allangortinneqartumi, tulliuttut allanguutigineqartut pillugit naalakkersuisup saqqummiussaanut qujalluta Naleqqamiit imatut oqaaseqarfigissavarput.

Meeqqat atuarfiat pillugu angusat pitsaannerusut angorusullugit pitsanngorsaaviguarneqartartoq Naleqqap tamanna pingaartitalugu ilisimavaa, taamaammat siunnersuutit atuarfimmuut tunngasut pitsanngorsaataasinnaasut tikilluaqqujuaannarpagut, meeqqat atuarfiat pillugu oqalliseqataanissamut inissaqartitsiuaannarluta.

Pingaartutut isigiuannarparput meeqqat atuarfiat atuartuutiminut pitsaannerusumik atuartumullu angusaqartitsiviusussamik kinguneqartussamik pitsanngorsaaffiginiarneqaleraangat aamma qanoq iliornikkut pitsanngorsarneqarsinnaanersut oqallisigineqarlutillu iliuuseqarfigineqartarnissaat pingaartutut isigalutigu.

Inatsisissatut siunnersuummut tunngatillugu tusarniaasoqarnerani maluginiarparput siunnersuut tapersorsorneqartoq annikitsunnguit eqqaasannikkaanni, taamatuttaaq tusarniaanermi ippigineqartut iluarsineqartarsimasut maluginiakkatta aamma ilagaat.

Taamaammat siunnersuutit siunertai pitsaasutut isigaagut. Meeqqat atuarfianni matumuuna ineriartortitsisoqarnera atuarfimmuut atuartunullu angusaqarfiusumik pitsanngoriartitsinissanillu



imallit imminerminni pitsaasuupput, siunnersuutigineqartullu inissaminiittutut aamma paasiuminartutut isigalutigit.

Tassami meeqqat atuarfiata ukioq atuarfiusoq aallartikkaangat atuartuutiminut angusaqarfiulluurtumik ukiup ingerlanissaa isumalluarfigiuartarpaa, tassaammammi meeqqat atuarfiat nunatta ineriartornissaanut pingaarnerpaaq. Taamaattumik atuarfik pineqartillugu suliniutit pitsanngorsaataasinnaasut iluatinnartutut tamatigut isigisariaqarput.

Siullertut meeqqat atuarfianni meeqqat atugarissaarnissaat salliutinniarneqarnerani kissaat, meeqqat ajornartorsiutiminni oqaloqateqarsinnaanerannut ikiorserneqartarnissaannut tunngasoq isumamigut pitsaasuvoq tapersernarlunilu, tassami ullutsinni klasse atuartitaanikkut ilikkarfiusussaagaluartumi ilaatigut meeqqat ajornartorsiutiminni oqaloqateqarnissaminni pisariaqartitsisut pillugit klasse tamaat imaluunniit atuartut ataasiakkaat sunnertarmagit, tamaakkaluartoq paaserusunnarpoq angajoqaat tassunga tunngatillugu qanoq isumaqarnersut kiisalu paaserusunnarpoq angajoqqaaniit qisuariaataasinnaasut suusinnaanersut eqqarsaatigineqarsimanersut, tassami angajoqqaat ilaqarput meerartami ajornartorsiutaanni ilisimasaqanngitsunik, taakku qanoq paasinitinneqassanersut meeraasa oqaloqateqartalissagaluarpata ilaqartarmata socialimut tunniunneqarnissaminni imaluunniit arsaagaasinnaalernissamut ernumasunik, oqaloqateqalersinnaalernissamut tunngasut pitsaaqutit suunersut kiisalu angajoqqaat isaanniit sunniutigisinnaasai suunersut paaserusunnarpoq.

Aappaattut atuarfimmi pisortatut ilinniartitaaneq, tassunga tunngasumut malittarisassaliortoqarlunilu aalajangersaasoqarnissaa naammassineqarluni atuutilernissaanut qilanaarluta utaqqissavarput malinnaaffigissallutigulu, tassami atuarfinni annerni pisortatut atorfinittut ilinniaqqinnermi piumasaqaatitalimmi atorfinitsineqatalissaapata imminermut taanna tulluurtuuvuq, tassami pisortat tamatigut piginnaanngorsaqqinneqartuartaqarput pisortatut ilinniarnissamut meeqqat atuarfiani ingerlatsineq nukittuujuuannassappat, pisortatummi unammilligallat arlaqartarmata, taamaammat anguniagaq siunnersuut isummamigut pitsaasuusoq oqaatigissavarput.

Pingajuattut klasse amerlassusissaasa aqunneqarsinnaanissaannik periarfissaqartitsilersinnaasumik § 6 imm. 2 nutaatut ikkussisoqarnerata takutiinnarpaa klassemi atuartunik annikillisaasoqaraluarpat ilinniartitsisoqarniarnikkut aamma klassemi ineeqqani amigaateqalernissamut aningaasatigut



eqquisusaanera eqqarsaatigineqarsimasoq, taamaammat periarfissamik nutaatut ikkussisoqarnera inissaminiitutum isigaarput. Tassami nalunngereerparput ilisimatuussutsikkut uppernarsarneqartarnikuusoq atuartut klassemi amerlassusaat ilikkarniarnermut angusaqarniarnermullu sunniuteqartarnerat annikitsuaraasoq, klassemi atuartut ikinnerit amerlanerusulluunniit qitiutinneqanngitsoq.

Aamma ilisimareerparput nammineq suliuniuteqarnikkut klassemi atuartut amerlassusiisa amerlanerpaaffissaat kommunalbestyrelsit ullumikkut aalajangiisinnaareersut, taamaammat tassunga tunngatillugu atuarfiup iluani tunnganngitsunik atuartut ajornartorsiutiminni oqaloqateqarsinnaalernissaannut § 38 imm.1-imi normutut nutaatut ikkussisoqarnera pineqartumut imminnut ataqatigiisinneqartutut isigaagut iluaqutaasussatullu takorloorlutigu

Sisamaattut soorunami taperserparput teknologip siuarsarnissaanut soorlu IT-mik paasinninnermik aamalu digitalimik perorsarsimassutsikkut allatigullu qarasaasiamik atuinikkut ullutsinni nunarsuarmiooqataanitsinni tassuuna aamma atuartut malinnaatinneqarluarnissaat pingartuummat, taassuma annertunerusumik inerisaaffigeqqinnissaat Naleqqamiit pingartipparput, taamatut oqarnitsinnut ilaatigut meeqqat pissakinnerusutut inissisimasut qarasaasiatigut allatigullu imaaliallaannaq pissarsisinnaanngitsut ilanngullugit anguniagaqarnissaq aamma pingartuuvoq.

Tallimaattut oqaluttuarisaanerup fagitut immikkoortutut inissinnissaa pissusissamisoortutut isigaarput, pissutigalugu kinaassutsimut naleqartitanillu inuiaat oqaluttuarisaanerat paasissallugu pingartuummat, inuttullu ineriartornermi tunngaviliisutut inissisimasarluni.

Naggataatigullu oqaatigissavarput ilinniartitsissutissat sumiiffinni ataasiakkaani toqqagassanut tunngatillugu aqqissuunneqarneri pitsaasutut nalileratsigit, tassami mernguernartulerinermi sammineqarsinnaasut atuartut ukiuit aallavigalugit pingartitatik kissaatitillu isiginerullugit imminut inuttut siuarsarnissaminnut tapertaliullugu soqutigisamminni aallaaveqartumi inerisarneq ingerlanneqarsinnaalissammat.

Taamak oqaaseqarlunga Inatsisissatut siunnersuut Ilinniartitaanermut, kultureqarnermut, ilisimatusarnermut ilageeqarnermullu ataatsimiitsitaliamut ingerlateqqinneqarnissaa innersuussutigaarput, sulilluarnissaannullu kissaallugit.